

四庫全書

集部

欽定四庫全書

集部

劍南詩藁卷十三

詳校官庶吉士_臣陳若霖

主事_臣呂雲棟覆勘

總校官檢討_臣何思鈞

校對官修撰_臣戴衢亨

謄錄監生_臣楊浚明

欽定四庫全書

劔南詩藁卷十三

宋 陸游 撰

宿黃僊觀兵火焚蕩之餘惟一殿突兀猶在黃僊
蓋與許旌陽同時飛昇者

拔宅翛然上碧虛神僊豈亦愛吾廬重門不改雲山色
古殿猶存劫火餘翠木蕭森高蔽日黃冠貧窶自畦蔬
殘年安得長來此一椀松肪讀隱書

玉隆得丹芝

何用金丹九轉成手持芝草已身輕
祥雲平地擁笙鶴便自西山朝玉京

贈西山老人

生世不把筆殘年惟灌園
賃春來竝舍賣畫到前村
勤苦供租稅清貧遺子孫
從來棲遁志剩欲與翁言

病酒宿土坊驛

少時見酒喜欲舞老大畏酒如畏虎
一日飲酒三日病

客路那堪夜聞雨雨聲蕭蕭宿空堂不寐始知更漏長
賣藥思從伯休隱愛花却笑拾遺狂

十一月上七日蔬飯驛嶺小店

新杭炊飯白勝玉枯松作薪香出屋冰蔬雪菌競登槃
瓦鉢羶巾俱不俗曉途微雨壓征塵午店清泉帶脩竹
建谿小春初出碾一碗細乳浮銀粟老來畏酒厭芻豢
却喜今朝食無肉尚嫌車馬苦縻人會入青雲騎白鹿

進賢驛感懷

明日當歸
至臨川

環走幾千里馳歸亦再旬
征途饒感慨訟牒費精神
風雪常欺客文章本誤身
小詩無傑思猶得當吟呻

入臨川境馬上作

投老縻身簿領間却因馬上得偷閒
兼旬敢恨常為客一飯何曾不對山
銅鏡無情欺白髮霜風有力散酡顏
今宵要看浮橋月儘放征騑晚入關

別楊秀才

歲暮江頭又語離淡煙衰草不勝悲
俗人情憤寧知子

心事悠悠欲語誰
燈暗想傾澆悶酒路長應和贈行詩
人生但要身彊健一笑相從自有時

發臨川

見客道傍店添衣
江上村陂長風浩浩山遠霧昏昏
虛日人聲合凶年菜色繁
扶衰歸北闕何以報君恩

早行

江路迢迢馬首東
臨川一夢又成空
日高未泫晨霜白
風勁先消卯酒紅
山市人經饑饉後
孤生身老道途中

著身穩處君知否射的峯前臥釣蓬

白干鋪別傳用之主簿

我行忽百里送客亦已空傳子獨眷眷旦暮隨此翁謝
之不肯去瘦馬衝北風泥濺及馬臆霜飛逼裘茸茅店
得小語慨然念年凶不作兒女悲道義相磨礱我歸亦
何為魚鳥愁池籠君乃臺閣人鸞鳳儀笙鏞若耶遶青
山予草堂在若耶溪上天祿摩蒼穹此別各努力出處何必同
過茱萸鋪青松朱戶前臨大道絕似西隄亭驛悵

然有作

茱萸小驛夕陽愁搔首臨風感舊遊
渾似軍行散關路但無鼓吹動涼州

青溪道中行古松間因少留瀹茶而行

露濕青松細細香旋呼拄杖踏斜陽
三生舊發遊山願一卷新傳辟穀方
雲外未論笙鶴近塵中實厭簿書忙
拾樵汲澗俱清絕聊為煎茶一據牀

弋陽縣江上書觸目

縣前奇哉一江水日暮風吹碧鱗起客恨征塵忽如洗
不用金篦刮眸子丹楓岸邊雪色蘆下有老翁方捕魚
欲求妙思貌畫圖王維鄭虔今世無

乾封驛早行

己巳被驛書乙亥戒徂兩扶衰犯霜露疲憊不可狀夜
行星滿天晨起雞初唱槁枝燒代燭凍菜擷供餉三年
走萬里天幸苟亡恙深知賦材薄自笑得名妄宣溫望
玉座何以待諮訪春江色如藍歸舟行可榜

過江山縣浮橋有感

堪笑行人日日忙又扶衰病過浮梁灘流急處水禽下
桑葉空時村酒香枯枿敢懷貪雨露飢鴻自憫犯風霜
宦途商略無安處早晚歸耕剡曲旁

衢州早行書懷

隣雞已三號殘燭無一寸參差發行橐迢遞望前頓滿
靴霜若雪破面風抵刃敢辭行路難漸喜京邑近少年
奉朝請親見堯授舜飄然如脫葉蹭蹬垂七閩風埃暗

征袍歲月集衰鬢餘生迫歸休周行愧英俊

杭頭晚興

嚴州

山色蒼寒野色昏下程初閉驛亭門
不須更把澆愁酒行盡天涯慣斷魂

又

落葉孤村晚下程癡雲殘日半陰晴
篝爐火煖牀敷穩臥聽黃鴉穀穀聲

行至嚴州壽昌縣界得請許免入奏仍除外官感

思述懷

曉傳尺一到江村拜起朝衣漬淚痕敢恨帝城如日遠
喜聞天語似春溫翰林惟奉還山詔湘水空招去國魂
聖主恩深何力報時從天末望修門

桐廬縣泛舟東歸

桐江艇子去乘月笠澤老翁歸放慵一尺輪囷霜蟹美
十分潋灩社醅濃宦遊何啻路九折歸臥恨無山萬重
醉裏試吹蒼玉笛為君中夜舞魚龍

予欲自嚴買船下七里灘謁嚴光祠而歸會灘淺
陸行至桐廬始能泛江因得絕句

客星祠下渺煙波欠我扁舟舞短蓑不為窮冬怕灘惡
正愁此老笑人多

又

桐廬縣前艣聲急蒼煙茫茫白鳥雙亂山日落潮未落
勝絕不減吳松江

漁浦

桐廬處處是新詩
漁浦江山天下稀
安得移家常住此
隨潮入縣伴潮歸

又

漁翁持魚叩舷賣
炯炯綠瞳雙臉丹
我欲從之逝已遠
菱歌一曲暮江寒

蕭山

素衣已免染京塵
一笑江邊整幅巾
入港綠潮深蘸岸
披雲白塢遠招人
功名姑付未來劫
詩酒何孤見在身

會向桐江謀小築浮家從此往來頻

辛丑正月三日雪

開歲尚殘冬佳哉雪意濃潤歸千里麥聲亂五更鐘簾隙收初密牆隅積已重龍團笑羔酒狐腋襲駝茸危檻

臨歌竹幽窓聽墮松忽思西戍日憑堞待傳烽

予從戎日嘗大

雪中登興元城上高興亭待平安火至

正月二十八日大雪過若耶溪至雲門山中

山中看雪醉騎驢清賞真成十載無高壓孤峰增峭絕

斜傾叢竹失枝梧松肪火暖眠僧榻芋糝羹香擁地爐
病骨雖癯猶健在未應遽作臥遊圖

雪中登雲泉上方

滃滃雲堆上茫茫雪海中煎茶誇坐客打竹課蠻童
冰谷鳴飢鶴煙汀立斷鴻歸來更堪喜葑火滿爐紅

僧以葑為

衝雪至餘慶覺林雪連日不止

策蹇清吟涉若耶灞橋猶恨近京華山前千頃誰種玉

座上六時天散花林雀無聲溪竹斷炊煙不動竹籬斜
勝遊更覺平生少未羨銀河泛客槎

大雪歌

若耶溪頭朝暮雪鴉鵲墮死長松折橫飛忽已平履齒
亂點似欲粧簾纈放翁憑閣喜欲顛摩娑拄杖向渠說
莫辭從我上嵯峨此景與子同清絕銀盃拌蜜非老事
石鼎煎茶且時啜題詩但覺退筆鋒把酒未易生耳熱
扶衰忍冷君勿笑報國寸心堅似鐵漁陽上谷要一行

馬蹄蹴踏河冰裂

雪霽歸湖上過千秋觀少留

縱轡不嫌遠逢山猶一登夕陽陂渺渺殘雪塙層層折
竹橫遮道飢鳥下啄冰欲歸還小駐倚杖對峻嶒

二月四日作

早春風力已輕柔瓦雪消殘玉半溝飛蝶鳴鳩俱得意
東風應笑我閒愁

新築山亭戲作

危檻凌風出半空怪竒造化欲無功天垂繚白縈青外
人在紛紅駭綠中日月匆匆雙轉轂古今杳杳一飛鴻
酒酣獨臥林間石未許塵寰識此翁

春晴出遊

一春彊半病頗廢山澤遊今晨忽良已風日亦清柔朝
食具冷餅瘦骨辭重裘穉荷出溝港芳杜滿汀洲勿言
酒苦薄一笑失百憂且當詠尋壑詎必賦登樓

題山家壁

山中無傳漏猿鳴知既夕芳藤上幽援素月照高壁主人殊喜事歡若有夙昔稚子槃竹槃炊黍持餉客卜隣雖未辨清嘯聊自適衰病久廢詩筆端歎荆棘

春晚風雨中作

箕踞藜牀岸幅巾何妨病酒住湖濱駕風浪作連三日掃地花空又一春樂事清宵當秉燭畏途平地有摧輪頽然耐辱君無怪元是人間澹蕩人

北窓

九陌黃塵早暮忙幽人自愛北窓涼清吟微變舊詩律
細字閒抄新酒方草木扶疎春已去琴書蕭散日初長
破羌臨罷楮頤久又破銅匱半篆香

山中晚興

薄酒亦陶然偃蹇澗石側巾墮拄杖橫意象頗自得青
山受落日忽作玻璃色躊躇不忍去下磴天已黑

夜登山亭

飛觀崢嶸天宇寬幽人半醉凭闌干三山渺渺鸞鶴遠

七澤茫茫蓑笠寒清吹拂林橫玉笛紫雲覆鼎熟金丹
童顏綠鬢無人識回首塵寰一夢殘

西村醉歸

俠氣崢嶸蓋九州一生常恥為身謀酒寧剩欠尋常債
劒不虛施細碎讎

見孟東野詩

岐路凋零白羽箭風霜破弊

黑貂裘陽狂自是英豪事村市歸來醉跨牛

自詠

三十年前接俊遊即今身世寄滄洲
俚聲不辨諧韶韻

暮氣寧能徹斗牛綠酒可人消永日黃鸝多事管閒愁
吹笙跨鶴何時去剩欲平章太華秋

閒中頗有四方之志偶得長句

世論紛紛枉見仇吾身自計本悠悠讀書漸嬾惟思睡
壓酒初成不怕愁蜀棧冷雲侵瘦馬楚江籠月繫孤舟
興來會作飄然去更續騷人賦遠遊

遣興

綠髮凋零白髮多山林未死且婆娑無端忤俗坐狂耳

甚欲讀書如嬾何
雨過亂蓑堆野艇
月明長笛和菱歌
此中得意君須領
莫愛車前印幾窠

又

遠簷新葉著啼鶯
睡起東窓一榻橫
愁衮衮來疑有約
春堂堂去恨無情
鶻飛局上新棋勢
龍吼牀頭古劍聲
莫歎柴荆無客到
綠尊還對莫山傾

醉題

坎止流行五十秋
胸中不解著閒愁
浩歌野渡驚雲起

狂舞空庭挽月留性本自然憎截鶴器非大受愧函牛
平生最愛嚴灘路早晚貂裘換釣舟

小園

小園煙草接隣家桑柘陰陰一徑斜臥讀陶詩未終卷
又乘微雨去鋤瓜

又

歷盡危機歇盡狂殘年惟有付耕桑麥秋天氣朝朝變
蠶月人家處處忙

又

村南村北鶉鴝聲
水剌新秧漫漫平
行遍天涯千萬里
却從隣父學春耕

又

少年壯氣吞殘虜
晚覺丘樊樂事多
駿馬寶刀俱一夢
夕陽閒和飯牛歌

步虛

微風吹碧海
細細生龍鱗
半醉騎一鶴
去謁青華君
歸

來天風急吹我過緱山鏘然哦詩聲清曉落人間人間
仰視空浩浩遠孫白髮塵中老初見姬翁禮樂新千九
百年如電掃

又

瀛海日月洲蓬壺仙聖宅駕鶴一時遊海面日夜窄人
生蜉蝣耳一闕瓦甕中天地廣如許誰能發其蒙丹書
千卷藏一塵子能求之勿從人晴窓趺坐春滿腹崑崙
待得丹芝熟

又

曩者過洛陽宮闕侵雲起今者過洛陽蕭然但荒壘銅
駝臥深棘使我惻愴多可憐陌上人亦復笑且歌世事
茫茫幾成壞萬人看花身獨在北邙秋風吹野蒿古墓
漸平新冢高

又

一瓢小如繭芳醪溢其中醉此一市人吾瓢故無窮不
言術神奇要是心廣大觴豆有德色笑子乃爾隘岳陽

樓中橫笛聲分明為子說長生金丹養成不自服度盡
世人朝玉京

醉中登避暑臺

半醉行歌上古臺脫巾散髮謝氛埃但知禮豈為我設
莫管客從何處來剡曲煙波菱蔓滑耶溪風露藕花開
老來世事渾成嬾一櫂幽尋未擬回

立秋前三日夜坐庭中偶賦

絳闕清都侍宴還天風搖珮夜珊珊月輪桂滿蟾初冷

星渚橋空鵲尚閒一鶴每臨雲雨上幾人虛老市朝間

試將綠髮窺清鏡未愧僊姝玉鍊顏

李文饒詩云河漢女玉鍊顏雲輶往

往到
人間

南堂臥觀月

河漢橫斜星宿稀臥看涼月入窓扉恍如北戍梁州日
睡覺清霜滿鐵衣

夜坐獨酌

玉宇沉沉夜向闌跨空飛閣倚高寒一壺清露來雲表

聊為幽人洗肺肝

夜興

鶴瘦龜飢與靜宜更闌徙倚竝清池月當三五初盈夜
河直西南欲落時浩浩醉歌羣鷺起翩翩孤影角巾欹
飛僊授我青瑤簡索賦山中夜興詩

月夜泛小舟湖中三更乃歸

落日愁思把釣鉤南隣借得采菱舟湖心月上明如晝
樹杪風生冷逼秋壯歲功名慚汗馬暮年心事許沙鷗

桐江一葉真奇策莫為兒曹作滯留

無題

半醉凌風過月旁水精宮殿桂花香
素娥定赴瑤池宴
侍女皆騎白鳳凰

又

出繭脩眉淡薄粧
丁東環佩立西廂
人間浪作新秋感
銀闕瓊樓夜夜涼

自山中夜行還湖上

火雲崢嶸水車鳴行人畏熱不敢寧蕭然一馬兩園丁
缺月照我影伶俜荒鷄起早忽再唱北斗低盡餘三星
扁舟菱歌正嫋嫋叢冢鬼火何熒熒迎人漸見鏡湖白
回首已失秦山青道邊野店得小憩一盃濁酒傾殘瓶
登盤絕愛畦韭美轅釜未厭谿鱗腥丈夫所要飽辛苦
文叔尚困蕪婁亭

大風

今年毒熱不可支白汗如雨愁纖絺皇天悔禍為一洗

秋風作意來如期聲如怒濤撼坤軸夜半折我南齋竹
幽人晨起得竒觀鳳尾襪襪一窓綠

新秋

天河漸近鵲橋時一夜風吹斗柄移金井梧桐元未覺
畫廊蟋蟀已先知青燈耿耿還相伴白髮蕭蕭只自悲
猶勝玉門關外客臥聽沙雁數歸期

月夕睡起獨吟有懷建康叅政

月上虛堂一榻橫斷香漠漠欲三更隔簾清露挾秋氣

繞樹驚鴉啼月明只怪夢尋千里道不知愁作幾重城
苦吟更恨知心少西望金陵闕寄聲

病瘡後偶書

秋色已蕭然曲肱清夜眠孤燈欺病後薄酒慰愁邊藥
物從人乞文章畏客傳惟應一篷艇湖海送凋年

秋日聞蟬

斷角斜陽觸處愁長亭搔首晚悠悠世間最是蟬堪恨
送盡行人更送秋

感秋

南山射虎漫英雄投老還鄉一秃翁
世味掃除和蠟盡生涯零落併錐空
秋驚蠹葉凋殘綠病著衰顏失舊紅
笠澤松陵家世事一竿惟是待西風

南軒

今年秋早涼七月已蕭然南軒修竹下
枕簟終日眠時將半殘夢聽此欲斷蟬
推枕起太息四序忽已遷功名墮渺莽
衰疾方沈緜新月獨多情窺窓澹娟娟

夜坐

虛堂夜無寐顧影歎吟謁露濕螢黏草雲迷雁落汀舊
書開蠹簡濁酒倒殘甌流落知無憾危機實飽經

新涼書事

臥看鳥篆印蒼苔窓戶涼生亦樂哉鳴樹亂蟬催日落
拂堦飛葉報秋來病餘已覺身如寄醉裏却憐心尚孩
排日從今占幽事折殘籬菊探溪梅

聞蟬思南鄭

昔在南鄭時送客褒谷口金羈叱撥駒玉盃蒲萄酒醉
歸涉漾水鳴蟬在高柳回鞭指秦中所懼壯心負人生
豈易料蹭蹬十年後蟬聲恍如昔而我已白首逆寇亡
形具輿地淪陷久豈無好少年共取印如斗

憶昔

憶昔浮江發劔南夕陽船尾每相銜楠陰暗處尋高寺

荔子紅時宿下巖

高寺在瀘州下巖在雲安軍

硤口烹猪賽龍廟沙

頭伐鼓挂風帆區區陳迹何由記惟有征塵尚滿衫

病中夜興

病瘧秋來久未平
草堂遙夜不勝清
疾風遞響驚林葉
列宿收芒避月明
百計不能逃白髮
一生堪笑役虛名
釣車且作桐江夢
莫念安西萬里行

秋夜

秋氣侵帷夢不成
一燈西壁翳還明
風高露井無桐葉
雨急煙村有雁聲
擊筑誰同燕市飲
賃春方作會稽行
從來自許知何等
堪歎江湖白髮生

謝張時可通判贈詩編

聖朝中興六十年君家文武何聯翩先生劔履冠麟閣
後嗣簪橐陪甘泉流傳到君愈卓犖投我千篇皆傑作
未分玉帳萬貔貅且擅詩人一丘壑爾來士氣日靡靡
文章光燄伏不起君今已似驥籥雲更看他年鯢擊水
酬莊器之賢良見贈

先朝六科親策士事業功名何壯偉元祐復科財數年
所得四三俄復止中興思賢形夢想屢詔自是朝廷美

新詩日人卷十三
紉袴小兒壞人事賜帛西歸困嘲詆諸公相視歎才難
一士臥雲誰挽起跨驢過我時共語晁董千年元不死
高談亶亶有脉絡橫得虛名吾可恥烏巾白紵塞路衢
砥柱頽波望吾子

舟過樊江憩民家具食

旅食何妨美蕨薇夕陽來叩野人扉蕭蕭短鬢秋初冷
寂寂空村歲薦饑蓼岸刺船驚雁起煙陂吹笛喚牛歸
詩情剩向窮途得蹭蹬人間未必非

舟中作

斷岸飲醵觥清波跳噉喁紅橋未斜日白堦已昏鐘詩
律與年邁客愁如酒濃宋公題壁處橫靄抱孤峰

稱心寺有

宋考功詩而予所未到望之慨然

九月三日泛舟湖中作

兒童隨笑放翁狂又向湖邊上野航魚市人家滿斜日
菊花天氣近新霜重重紅樹秋山晚獵獵青帘社酒香
隣曲莫辭同一醉十年客裏過重陽

予自庚寅至辛丑始見九日于故山

霜天晚興

薄霜門巷不勝清
小立湖邊夕照明
紅顆帶芒收晚稻
綠苞和葉摘新橙
閒評琴價留僧話
靜聽松聲領鶴行
壯志消磨渾欲盡
西風莫動玉關情

九月六日小飲醒後作

短劍悲秦俠
高歌憶楚狂
酒醒愁袞袞
香冷夢悵悵
屋老垣衣茂
池深石髮長
地爐須早計
衰病怯新霜

書悲

今日我復悲，堅臥腳踏壁。古來共一死，何至爾寂寂。
秋風兩京道，上有邊馬跡。和戎壯士廢，憂國清淚滴。
關河入指顧，忠義勇推激。常恐埋山丘，不得委鋒鏑。
立功老無期，建議賤非職。賴有墨成池，淋漓豁胸臆。

又

丈夫孰能窮，吐氣成虹霓。覓酒東海乾，累麴南山齊。
平生塞旗手，頭白歸扶犁。誰知蓬窓夢，中有鐵馬嘶。
何當受詔出，函谷封九泥。築城天山北，開府蕭關西。
萬里掃

塵煙三邊無鼓鼙此意恐不遂月明號荒雞

中夜起出門月露浩然歸坐燈下有賦

月白萬瓦霜露重四山雨開門忽驚歎秋色已如許去
蜀如昨日坐閱四寒暑無才屏朝蹟有罪宜野處平生
萬里心收斂臥環堵朱顏逝不留白髮生幾縷人言尺
蠖屈要有黃鵠舉功名非老事歲晚忍羈旅

新寒

病怯新寒欲不禁南窓擁褐夜悵悵江湖跌宕送餘日

書劒蕭條孤壯心杜曲新愁隨斷雁遼陽遺恨入疎砧
此懷擬向何人說賴有昏燈伴苦吟

幽居

松陵甫里舊家風晚節何妨號放翁衰極睡魔殊有力
愁多酒聖欲無功一編蠹簡晴窓下數捲

一作掩

疎籬落

木中退士所圖惟一飽諸公好為致年豐

醉中步月湖上

閑餘時節早天氣已淒冷悠哉曳杖行樂此清夜永霜

風鏤病骨林月寫孤影新詩得復忘薄酒吹易醒浮生
役聲利百歲常鼎鼎清遊尙可繼終老謝人境

東村

塘路東頭烏柏林偶攜藤杖得幽尋桃源阡陌自來往
輞口雲山無古今遠浦過帆供極目暮天橫雁入微吟
歸來更覺愁無那剩放燈前酒碗深

西村

湖塘西去兩三家杖履經行日欲斜蹙蹙水紋生細縠

蜿蜿沙路臥修蛇
早餘蟲鏤園蔬葉
寒淺蜂爭野菊花
老去郊居多樂事
脫巾未用歎蒼華

題張幾仲所藏醉道士圖

千載風流賀季真
畫圖髣髴見精神
邇來祭酒皆巫祝
眼底難逢此輩人

又

臥聽牀頭壓酒聲
起行籬下摘新橙
一尊久欠敲門客
風味何人似麴生

山園草間菊數枝開席地獨酌

屋東菊畦蔓草荒瘦枝出草三尺長碎金狼藉不堪摘
掃地為渠持一觴日斜大醉叫墮幘野花村酒何曾擇
君不見詩人跌宕例如此蒼耳林中留太白

湖村月夕

客路風塵化素衣閒愁冉冉鬢成絲平生不負月明處
神女廟前聞竹枝

又

錦城曾醉六重陽回首秋風每斷腸
最憶銅壺門外路滿街歌吹月如霜

又

金尊翠杓猶能醉狐帽貂裘不怕寒
安得驂騑三萬足月中鼓吹渡桑乾

又

誰持綠酒醉幽人鶴氅筇枝發興新
今夜湖邊有奇事青山缺處涌冰輪

卯酒徑醉走筆

少時憑酒剩狂顛
摘宿緣雲欲上天
才盡氣衰空自笑
一盃纔放已頽然

山中望籬東楓樹有懷成都

五門西角紅樓下
一樹丹楓馬上看
回首舊遊如夢裏

西風吹淚倚闌干

紅樓蜀王所作
在五門西南隅

暮秋有懷王四季夷

鏡湖西畔小茅茨
紅葉黃花秋晚時
天閣素書無雁寄

夜闌清夢有燈知功名蹭蹬初何憾朋舊乖離未免悲
遙想扁舟五湖口阻風中酒又成詩

幽居

老子堪咍老轉癡幽居喜及早寒時芋魁加糝香出屋
菰首芼羹甘若飴菰首芼白也顛倒朱黃思誤字縱橫黑白
戲拈棋此懷敢向今人說骨朽諸賢却見知

有懷

筇杖斜斜倚素屏北窓遙夜冷如冰何時得與平生友

作字觀書共一燈

對酒

醫從和扁來未著却老方吾晚乃得之莫如麴蘖良一
盃臉生春沉復累十觴坐令桃花紅換盡霜葉黃看鏡
喜欲舞追還少年狂但恨寶釵樓胡沙隔咸陽芳華雖
無恙萬里遙相望

寶釵樓咸陽旗亭也芳華樓在成都合江園

感歎徑投枕

悲歡兩茫茫

初冬

鉏犂滿野及冬耕時聽兒童叱犢聲逐客固宜安散地
閒民何幸樂昇平雪花漫漫蕎將熟綠葉離離薺可烹
飯飽身閒書有課西窓來趁夕陽明

晝寢夢一客相過若有舊者夷粹可愛既覺作絕
句記之

夢中何許得嘉賓對影胡牀岸幅巾石鼎烹茶火煨栗
主人坦率客情真

書歎

多病文園苦滯留時時浩歎攬貂裘縱無夜雨何曾寐
不為秋風也自愁今歲頓驚絲鬢改此生難繼錦江遊
欲談舊事無人共日落鴉歸又倚樓

督下麥雨中夜歸

細雨閭村墟青煙濕廬舍兩兩犢並行陣陣鴉續下紅
稠水際蓼黃落屋邊柘力作不知勞歸路忽已夜犬吠
闌籬隙燈光出門罅豈惟露沾衣乃有泥沒胯誰憐甫
里翁白首學耕稼未言得一飽此段已可畫

霜曉肩輿行湖上

去去出柴關，巾車古陌間。
晨霜染丹葉，宿霧淡青山。
登覽身猶健，歌呼酒每慳。
殷勤鏡湖水，聊為照衰顏。

杜門

寂寞山深處，崢嶸歲暮時。
燒灰除菜蝗，

讀如橫字去聲

送芋謝

牛醫笕水晨澆藥，燈窓夜覆棋。
杜門君勿怪，遲暮少新知。

橫塘

橫塘南北埭西東拄杖飄然樂未窮農事漸興人滿野
霜寒初重雁橫空參差樓閣高城上寂歷村墟細雨中
新買一蓑苔樣綠此生端欲伴漁翁

是日偶買
蓑衣甚妙

書事寄良長老

素屏烏几野人廬山色蒼寒十月初雨足四郊耕欲遍
霜高萬木脫無餘一尊窓下澆愁酒數卷牀頭引睡書
寄語住菴劉老宿不應隨俗向人疎

食薺十韻

舍東種早韭生計似庾郎舍西種小菓戲學蠶叢鄉惟
薺天所賜青青被陵岡珍美屏鹽酪耿介凌雪霜采擷
無闕日烹飪有祕方候火地爐煖加糝沙鉢香尚嫌雜
筍蕨而況汙膏粱炊秬及鬻餅得此生輝光吾饒實易
足捫腹喜欲狂一掃萬錢食終老稽山旁

冬煖頗有春意追憶成都昔遊悵然有作

濯錦江邊罨畫樓金鞭曾護犢車遊紛紛萬事反乎覆
落落一身淹此留刻燭賦詩空入夢傾家釀酒不供愁

探春歌吹應如昨亦有朋儕記我不

忽忽

忽忽復悠悠頻驚歲月遒若無船貯酒將奈斛量愁列

炬燕宮夜

成都故蜀時燕王宮今屬張氏海棠為一城之冠

呼鷹漢廟秋

南鄭漢高

帝廟予從戎時多獵其下

週年莫多感夢境付滄洲

醉書山亭壁

物外陽狂五百年扁舟又繫鏡湖邊飛舁未抵簪花樂
遊宦何如聽雨眠綠蟻漚尊芳醞熟黑蛟落紙草書顛

忽拈玉笛橫吹去說與傍人是地仙

十月旦日至近村

鴨腳葉黃烏臼丹草煙小店風雨寒荒年人家雞黍迨
芋羹豆飯供時節村童上牛踏牛鼻吹笛聲長入雲際
今年雖飢却少安縣吏不來官放稅

蔬圃絕句

擬種蕪菁已是遲晚耘早韭恰當時老夫要作齋盂備
乞得青秧趁雨移

又

百錢新買綠蓑衣不羨黃金帶十圍枯柳坡頭風雨急
憑誰畫我荷鉏歸

又

青青蔬甲早寒天想像登盤已墮涎更欲鉏畦向東去
園丁來報竹行鞭

又

瓦壘浮屠盆作池池邊紅蓼兩三枝貪看忘却還家飯

恰似兒童放學時

又

小橋只在槿籬東
溝水穿籬曲折通
煙雨空濛最堪樂
從教打濕敗天公

又

衝雨衝風不怕寒
晚來日出短蓑乾
遶畦拾塊真為樂
莫作陶公運甓看

又

嬾隨年少愛花狂且伴羣兒鬪草忙行遍山南山北路
歸時新月浸橫塘

冬夜不寐至四鼓起作此詩

秦吳萬里車轍遍重到故鄉如隔生歲晚酒邊身老大
夜闌枕畔書縱橫殘燈無焰穴鼠出槁葉有聲村犬行
八十將軍能滅敵白頭吾欲事功名

高麗有識云當有八十老將平之李

英公實
膺是識

蔬圃

山翁老學圃自笑一何愚
硤瘠財三畝勤劬賴兩奴
正方畦畫局微潤土融酥
翦闢荆榛盡鉏犁磊塊無
過溝橫略約聚甕起浮屠

拾園中瓦礫作小墻

隙地成瓜援餘功及芋

區如絲細生菜似鴨爛蒸壺
此事今真辨東歸不為鱸

夢中作

拓地移屯過酒泉第功圖像上
凌煙事權皂纛兼黃鉞
富貴金貂映玉蟬油築毬場
飛驒裏錦裁步障貯嬋娟
擁塗士女千層看應記新豐舊少年

村居酒熟偶無肉食煮菜羹飲酒

歌鳳偃偃類楚狂畏犧齷齷笑蒙莊著書幸可俟後世

對客從嗔臥大牀三畝青蔬了盤筋一缸濁酒具盃觴

丈夫窮達皆常事富貴何妨食萬羊

李文饒嘗遇異人云平生當食萬羊

辛丑十月諸公餽酒偶及百榼戲題長句

喜事諸公尚見存尺書時到爵羅門已邀風月成三友

聊對湖山倒百尊醉墨淋漓動高壁狂歌悲壯落前村

悠然睡起西窓黑一點青燈又斷魂

灌園

少攜一劒行天下晚落空村學灌園
交舊凋零身老病輪囷肝膽與誰論

幽居

破屋頽垣霧雨昏幽人終日掩柴門
因鋤衰草通南阜偶洗叢篁見北村
裋褐奇溫等狐腋寒蔬脆美敵熊蹯
冬來酒戶微增舊萬事應須付一尊

日出行

吾聞開闢來白日行長空扶桑誰曾到崦嵫不可窮但
見旦旦升天東但見暮暮入地中使我倏忽成老翁鏡
裏衰鬢成霜蓬我願一日一百二十刻我願一生一千
二百歲四海諸公常在座綠酒金尊終日醉高樓錦繡
中天開樂作畫鼓如春雷歡爾白日無西頽常行九十
萬里胡為哉

午醉徑睡比覺已甲夜矣

自我歸城西已復再見冬雖未挂衣冠其實則老農好

事或餉酒石室酒最醲一醉輒至暮臥聞湖寺鐘心安
病自除衾煖夢欲重化作孤鶴去雲崦巢長松

簡蘇訓直判院莊器之賢良

行盡天涯白髮新槿籬竹屋著閒身讀書達旦失衰病
食菜終年安賤貧正使寄聲無薛孟不妨同里有荀陳
從今杖履時相過花柳村村次第春

醉眠曲

老夫暮年少嗜好但願無事終日眠斜風急雨勢方橫

低窓小閣且幽妍
爐紅酒綠足閒暇
橙黃蟹紫窮芳鮮
一盃一盃意忽倦
徑撥紙帳投蠻氊
鼻間鼾聲欲撼屋
手中書冊正墮前
不知校事白中聖
那惜門生嘲腹便
讀書萬卷晚乃悟
妙哉此訣祕不傳
是醒是醉人莫測
非夢非覺中了然
駸駸百年露電速
鼎鼎一世膏火煎
金丹九轉顧未暇
且向人間稱睡僊

冬夜

歲晚風霜惡將如
遙夜何殘燈挑更
暗寒犬吠偏多支

枕成孤詠懷人起浩歌梅花不解飲誰伴醉顏酡

又

忽忽流年恨悠悠獨夜情向人燈欲語遶舍露如傾夢
每輕千里愁偏怯五更殷勤桑落酒好為解餘醒

夜話贈華師

少喜洛陽俠今成衡嶽僧深培地爐火明照佛龕燈衰
鬢晨霜白禪心古澗澄猶能遍參在為我買行滕

臥病書懷

袞袞年光挽不留即今已白五分頭病中對酒猶思醉
夢裏逢人亦說愁青海戰雲臨賊壘黑山飛雪灑貂裘
丈夫有志終難料憔悴漁村死即休

病中絕句

酒錢自昔從人乞詩思出門何處無青筠織蓬管織席
此生端欲老江湖

又

半脫貂裘雪滿鞍慣將豪舉壓儒酸病來意氣渾非昨

一炷香煙帳底看

又

酒味醺人睡味濃
午時高枕到昏鐘
經旬不見西窓日
世上應無嬾似儂

又

造物今年憫我勞
微疴得遂閉門高
黃紬被暖青氊穩
不怕郊原雪意豪

又

青熒猶有佛燈明
點滴時聞竹露聲
欲睡不成還起坐
麗譙風順報三更

又

少時談舌挾風雷
病後逢人口嬾開
安得東臯隱君子
相看無語只銜盃

蔬園雜詠

菘

雨送寒聲滿背蓬
如今真是荷鋤翁
可憐遇事常遲鈍

九月區區種晚菘

蕪菁

往日蕪菁不到吳如今幽圃手親鉏憑誰為向曹瞞道
徹底無能合種蔬

葱

瓦盆麥飯伴隣翁黃菌青蔬放筯空一事尚非貧賤分

芼羹僭用大官葱

鄉圃有大官葱
比常葱差小

巢

昏昏霧雨暗衡茅兒女隨宜治酒殺便覺此身如在蜀

一盤籠餅是疏巢

蜀中雜蔬肉作巢饅頭佳甚唐人正謂饅頭為籠餅

芋


陸生晝臥腹便便歎息何時食萬錢莫謂蹲鴟少風味
賴渠撐拄過凶年

卯飲醉臥枕上有賦

天寒朝泥酒熟醉臥蓬窓雨勢平吞野風聲倒卷江漁
蓑傲狐腋菜把美羊腔常笑潮陽守南征畏下瀧

又

一榻臥空舍四山風雨聲病多書倚閣寒極酒施行孤
憤歌彌放端憂涕易橫羣羌滿河洛志士若為情



劔南詩藁卷十三

欽定四庫全書

集部

劍南詩藁卷十四

詳校官庶吉士臣陳若霖

主事臣呂雲棟覆勘

總校官檢討臣何思鈞

校對官修撰臣戴衢亨

謄錄監生臣楊浚明

欽定四庫全書

劔南詩藁卷十四

宋 陸游 撰

十月二十六日夜夢行南鄭道中既覺恍然攬筆
作此詩時且五鼓矣

孤雲兩角不可行望雲九井不可渡
蟠冢之山高插天
漢水滔滔日東去高皇試劔石為分草
沒苔封猶故處
將壇坡陀過千載中野疑有神物護我
時在幕府來往

無晨暮夜宿沔陽驛朝飯長木鋪雪中痛飲百榼空蹴
踏山林伐孤兔耽耽北山虎食人不知數孤兒寡婦讎
不報日落風生行旅懼我聞投袂起大噓聞百步奮戈
直前虎人立吼裂蒼崖血如注從騎三千皆秦人面青
氣奪空相顧國家未發渡遼師落魄人間傍行路對花
把酒學醞藉空辱諸公誦詩句即今衰病臥在牀振臂
猶思備征戍南人孰謂不知兵昔者亡秦楚三戶

雨晴步至山亭欲遂遊東村不果

村陋垣屋頽歲晚風雨橫泥塗絕還往殮粥養衰病藥
囊雜書卷白髮滿清鏡一榻臥兼旬不踐牆下徑烏鵲
忽報晴霜重節候正厭供凍硯愁頗動蠟屐興山楹快
遠眺松吹愜幽聽地瘦藥苗稀葉脫木枝勁東村未為
遠腳力不濟勝三歎入荆扉跣趺學僧定

喜晴

衡門病臥動經旬歲晚況堪風雨頻晴日一窓殊慰眼
清霜萬瓦更宜人開書頓失昏花墜試茗初看白乳新

南埭東陂從此好剩將紅藥插烏巾

對食

人苦不知足貪欲浩無窮
豹胎日饜飫萍藿却時供
飲豚以人乳萬藥亦改容
方其未遇時鵝鶩動英雄
哀哉王相國計墮飯後鐘
所以賢達士一視約與豐
我亦蹭蹬者羈遊半生中
木槃飽藜苒美與玉食同
口腹嗟幾何曾是役我躬
放箸一笑粲賦詩曉愚公

不睡

城遠不聞鐘鼓傳孤村風雨夜騷然但悲綠酒欺多病
敢恨青燈笑不眠水冷硯蟾初薄凍火殘香鴨尚微煙
虛窓忽報東方白且復繙經繡佛前

睡

紙帳青氊暖有餘昏昏信脚到華胥凍醪有力勤推挽
春茗無端苦破除半熟擁衾聞急雨乍回推枕覓殘書
箇中得意君知否萬戶一作里生封未必如

憶荊州舊遊

書劒萬里行翩翩度關登隴常慨然射麋雲夢最樂事
至今曠快思楚天落筆千言不加點班荆百榼命割鮮
有時憑陵呼五白笑人辛苦作太玄君不見將軍昔忍
跨下辱京兆晚為人所憐功名富貴自古只如此不如
馳射樂飲終殘年

五雲門晚歸

高城帶遠林落日動寒砧行客自朝暮青山無古今衰
遲慙逸氣憂患足危心溪迤滯歸艇何時春水深

冬暖

今年歲暮無風雪塵土肺肝生客熱經旬止酒臥空齋
吳蠡秦酥不容設日憂疾疫被齊民更畏螟蝗殘宿麥
濃霜薄霰不可得太息何時見三白老夫壯氣橫九州
坐想提兵西海頭萬騎吹笳行雪野玉花亂點黑貂裘
歲暮

吳中寒氣薄歲暮亦和風移樹來村北尋僧渡港東露
葵收半綠霜稻杵微紅一飽無餘念吾生正不窮

雪夜

書卷紛紛雜藥囊
擁衾時炷海南香
衰遲自笑壯心在
喜聽北風吹雪牀

又

村路雪泥人斷行
佛燈一點絳紗明
山前栖鶴歸何晚
磔磔風傳勁翮聲

禪室

早誇劇飲無勑敵
晚覺安禪有宿因
赫赫心光誰障礙

緜緜鼻息自輕勻蒲龕紙帳藏身穩香椀燈籠作夢新
勿為霜寒憶溫暖少林立雪彼何人

炭盡地爐危坐至夜分戲作

短景窓易黑長宵爐少紅直令貧到骨未害氣如虹志
士元謀道儒生敢諱窮霜嚴雞喔喔但愧讀書功

夜汲井水煮茶

病起罷觀書袖手清夜永四隣悄無語燈火正淒冷山
童亦睡熟汲水自煎茗鏘然轆轤聲百尺鳴古井肺腑

凜清寒毛骨亦蘇省歸來月滿廊惜踏疎梅影

雪後尋梅偶得絕句十首

雪晴蕭散曳筇枝小塢尋梅正及時臨水登山一年恨

十分說似要渠知

又

青帝宮中第一妃寶香熏徹素綃衣定知謫墮不容久

萬斛玉塵來聘歸

橘中四叟博輸玉塵九斛

又

銀燭檀槽醉海棠老來非復錦城狂
疎梅對影太清淡
為拂焦桐彈履霜

又

雪裏芬芳亦偶然世人便謂占春前
飽知桃李俗到骨
何至與渠爭著鞭

又

雙鵲飛來噪午晴一枝梅影向窗橫
幽人宿醉閒歌枕
不待聞香已解醒

又

竹籬曲曲水邊村
月澹霜清欲斷魂
商畧前身是飛燕
玉肌無粟立黃昏

又

相逢未易可疎親
不是登牆宋玉隣
林下風標許誰比
直須江左謝夫人

又

春近山中日漸長
重重門掩闥幽香
神仙不飲塵凡酒

素面看人醉後狂

又

禁殿仙姝下界遊
偶來稅駕剡溪頭
君看月裏橫枝影
盡是蒼龍與翠虬

又

清霜夜夜奈寒何
賴是知心有素娥
枉道疎枝不禁笑
主人歡意自無多

寄朱元晦提舉

市聚蕭條極村墟凍餒稠勸分無積粟告糴未通流民
望甚飢渴公行胡滯留徵科得寬否尚及麥禾秋

村居冬日

溪轉樵風路林藏禹會村簷冰垂玉墀山月涌金盆畏
客常稱疾耽書不出門尚嫌城市近更擬卜雲根

寓天慶觀有林使君年八十七方燒丹云一黍米
大可化汞一斤為黃金梅道人年八十五善醫
世路崎嶇久已忘道腴禪悅度年光故攜開士降龍鉢

來寄高人夢蝶牀。只道燒金有劉向。不知賣藥是韓康。
日長坐覺非塵世。庭檜花開蜂蜜香。

宿天慶道院

衰病厭多事。清遊諧夙心。夜深樓突兀。歲晚柏蕭森。
汲井洗靈藥。焚香橫素琴。身閒境自勝。城市亦山林。

贈林使君

使君物外閱年華。厭聽奴兵早暮衙。雙履踏雲呼野渡。
一瓢邀月醉梅花。紅爐點汞閒消日。烏几繙經不憶家。

我亦岷山有歸處約君同載沂三巴

又

松檜陰中百步廊
我來剝啄叩琳房
魚腸寶劍餘蛟血
鴉嘴金鋤帶藥香
弱水蓬萊風浩浩
赤明龍漢劫茫茫
何妨付與神丹訣
教跨青鸞到帝鄉

冬夜

窮巷蕭條早閉門
北窓燈火夜昏昏
老于俗事不挂眼
愁憶故人空斷魂
急雪打窓飛礫細
狂風卷野怒濤翻

土牀紙帳寒無寐
彊把村醅不厭渾

宴坐

身窮寄山裏心安一事無
新傳小止觀漸解半跏趺
急雪鳴窓紙孤燈耿地爐
老來元少睡且復兀枯株

夢中作

路平沙軟淨無泥
香草丰茸沒馬蹄
擣紙聲中春日晚
恍然重到浣花溪

夜寒遣興

道人頽然寄北窓愁魔百萬一笑降夜闌酒渴有奇夢
吞楚七澤吳三江孤村蕭蕭雨解雪寒犬噤臥飢鼠齧
擁衾危坐待天明白首忍窮心似鐵

雪後出遊戲作

小巘平岡雪陸離幽人又賦探春詩典琴沽酒元非俗
著屐觀碑又一奇大度乾坤容落托多情風月笑衰遲
吾生也似梅花淡燕未歸來蝶不知

歲暮

半生浪走跨秦吳白首還如筮仕初凍芋濁醪邀里巷
昏煙濕雪暗郊墟窮空敢恨寒無褐憂患元因出有車
笑掩陳編聊自慰古來富貴羨樵漁

記夢

世事紛紛觸眼新何由常作夢中身遠遊萬里纔移刻
豪飲千場不忤人鼓吹滿城壺日晚鶯花如海洞天春
是間可老君知否莫信人言想與因

立春後三日作

拂面毵毵巷柳黃穿簾細細野梅香春回江表常年早
日向山中特地長千古事終輸釣艇一毫憂不到禪房
綠尊掩罷惟須睡高枕看人舉世忙

短景

短景迫窮冬日月如鳥過衡門窘風雨衰病不可那疎
疎屋茅漏獵獵窓紙破鼠豪冒燈出人倦掩屏臥中都
舊朋儕零落今幾箇弄筆欲遣愁孤吟誰與和

風雨旬日春後始晴

風吹過雁作斜行雨洗殘梅只淡香南浦春回波漸綠
東菴睡起日初長詩囊屬豪慚新思博齒爭豪悔昔狂
莫向晴窓對明鏡朱顏減盡鬢蒼蒼

乍晴風日已和泛舟至扶桑埭徘徊西村久之

十日風雨今日晴衰病忽減思閒行接籬一幅煙霧薄
舴艋八尺鳬鷺輕亭亭孤塢遠天碧曲曲深巷斜陽明
數家茅屋門晝掩不聞人聲聞碓聲身似龐公不入城
東阡南陌餞餘生新年倘有豐年喜買酒漁村看太平

晨起南窓晴日可愛戲作一絕

蕭散山林一幅巾
天公乞與自由身
茅簷不似宮墀暖
日滿南窓也可人

攜癭尊醉梅花下

楠癭作尊容
斗許擁腫輪囷元媚嫵
肯從放翁來住山
誰云置身不得所
山房寂寞久不飲
作意欲就梅花語
我病鮮歡花更甚
日暮淒涼泣殘雨
人生萬事雲茫茫
一醉常恐俗物妨
正須仙人冰雪膚
來伴老子鐵石腸

花前起舞花底臥花影漸東山月墮癭尊未竭狂未休
笑起題詩識吾過

城西接待院後竹下作

水邊小丘因古城上有巨竹數百箇一徑蛇蟠不容腳
平處乃可十客坐裊裊共看風枝舞蔌蔌時聽春籜墮
古佛不粧香火冷瘦僧如腊袈裟破門前西去長安路
日夜舳艫街尾過老夫本乏臺省姿且就清陰曲肱臥
夜飲示坐中

胡雁叫羣寒夜長
崢嶸北斗天中央
達人大觀眇萬物
烈士壯心懷四方
縱酒長鯨渴吞海
草書瘦蔓飽經霜
付君詩卷好收拾
後五百年無此狂

夜從父老飲酒村店作

旗亭濁酒典衣沽
蟬舍老翁折簡呼
夜中醉歸騎草驢
嵬昂不須宗武扶
丹徒布衣有籌略
漁陽突騎莫枝梧
牀頭金盡何足道
肝膽輪囷橫九區

壬寅新春

半生常是道邊人
歲晚初收事
外身濁酒一盃聊永日
小園三畝亦新春
尚無枕寄邯鄲夢
那有衣沾京洛塵
門外煙波三百里

鏡湖三百里

此心惟與白鷗親

幽居春夜

暮景催人雪鬢雙
十年始復反吾邦
雲逢佳月每避舍
酒壓閒愁如受降
三弄笛聲初到枕
一枝梅影正橫窗
要知清夢遊何許
不釣桐江即錦江

讀書

放翁白首歸剡曲寂寞衡門書滿屋藜羹麥飯冷不嘗
要足平生五車讀校讎心苦謹塗乙吟諷聲悲雜歌哭
三蒼竒字已殺青九譯旁行方著錄有時達旦不滅燈
急雪打窓聞簌簌倘年七十尚一紀墜典斷編真可續
客來不怕笑書癡終勝牙籤新未觸

晨起

小雨濕清曉新鷺啼早春年光驚病眼節物屬閒身已
破東連楚嶓山北控秦遠遊端可繼敢恨素衣塵

昔在成都正月七日聖壽寺麻子市初春行樂處
也偶晨興聞鄰村守麻有感

樂事新年入錦城城南麻市試春行如今老病茅簷底
臥聽兒童嚇雀聲

獨孤生策字景略河中人工文善射喜擊劒一世
奇士也有自峽中來者言其死于忠涪間感涕
賦詩

憶昨騎驢入蜀關旗亭邂逅一開顏氣鍾太華中條秀

文在先秦兩漢間寶劍憑誰占斗氣名駒竟失養天閑
身今老病投空谷回首東風涕自潛

早春對酒感懷

探花疇昔喜春回老大空驚節物催芳瓮旋開新壓酒
好枝猶把未殘梅書生歲惡甘藜覓志士時平死草萊
初聞獨孤策死欲豁孤懷誰晤語夜彈長劍有餘哀

曉出湖邊摘野蔬

浩歌振履出茅堂翠蔓丹芽采擷忙且勝堆盤供苜蓿

未言滿斛進檳榔行迎風露衣巾爽淨洗羶葷七筋香
著句誇張君勿笑故人方厭太官羊

洊饑之餘復苦久雨感歎有作

道傍襁負去何之積雨仍愁麥不支為國憂民空激烈
殺身報主已差池屬餽糠粃猶多愧徙倚柴荆只自悲
十載西遊無惡歲羨他村野足蹲鴟

予在蜀幾十年
未嘗逢歲歉也

春晴泛舟

兒童莫笑是陳人湖海春回發興新雷動風行驚蟄戶

前一日
聞雷
天開地闢轉鴻鈞
鱗鱗江色漲
石黛嫋嫋柳絲

搖麴塵欲上蘭亭
却回棹笑談終覺愧清真

攜一尊尋春湖上

酒裏真須勉策勳
百年何啻是中分
花梢已點猩猩血
水面初生瑟瑟紋
一世極知均腐骨
萬鍾元自付浮雲
浩歌不恨無人和
但惜驚飛白鷺羣

晦前二日夜欲曉自湖上歸對殘月獨酌

小閣對寒蟾
山尊盡更添
方看一輪滿
又歎兩頭纖
脉

脉離雲嶠娟娟傍畫簷五更清露下不恨客衣霑

春曉有感

山杏溪桃續續開緩歌誰與共傳盃年來只有追歡夢
百舌無情又喚回

夜觀秦蜀地圖

往者行省臨秦中我亦急服叨從戎散關摩雲俯賊壘
清渭如帶陳軍容高旌縹緲嚴玉帳畫角悲壯傳霜風
咸陽不勞三日到幽州正可一炬空意氣已無雞鹿塞

單于合入蒲萄宮燈前此圖忽到眼白首流落悲塗窮
吾皇英武同世祖諸將行策雲臺功孤臣昧死欲自薦
君門萬里無由通正令選壯不為用筆墨尚可輸微忠
何當勒銘紀北伐更擬草奏祈東封

久雨小飲

春來日日風雨橫老去時時衰病攻門外回塘初漲綠
尊前槁面慙生紅未除豪氣每自笑欲吐狂言無與同
安得并刀剪簷溜憑高萬里望晴空

有懷獨孤景略

富貴世間元不乏此君才大獨難成
喑鳴意氣千人廢
嫺雅風流一座傾
韜畧豈勞平大敵
文章亦足主齊盟
荒山野水涪州路
腸斷西風薤露聲

春雨復寒遣懷

去日堂堂挽不回
新年又傍鬢邊來
雨聲欲作海棠崇
書卷只為春睡媒
村舍瘦蔬供薄酒
地爐微火伴殘灰
浩然忽起金鞭興
漾水嶓山安在哉

春遊

平生樂行役不耐常閉戶今朝新雨霽一笑整巾屨青
猿導幽蹊春草伴微步雖云尊酒薄蔬果亦畧具辛夷
發高枝楊柳吹墮絮行歌不知遠落日呼野渡橫林已
棲鴉淺水猶立鷺歸來意頗豪古錦有新句

海棠

今日春已半風雨停出遊餅中海棠花數酌相獻酬尚
想錦官城花時樂事稠金鞭過南市紅燭宴西樓千林

誇盛麗一枝賞纖柔狂吟恨未工爛醉死即休那知茅
簷底白髮見花愁花亦如病姝掩抑向客羞尤物終動
人要非桃杏儔東風萬里恨浩蕩不可收

寄仗錫平老借用其聽琴詩韻

放翁久矣無此客闔戶兒童皆動色寒泉不食人喝死
素縷銀瓶我心惻千金易得一士難晚途淹泊眼愈寒
豈知一旦乃見子傑語豪筆無僧酸門前清溪天作底
細細風吹縠紋起倚欄一笑誰得知愛子數詩如此水

江湖安得常相從
浩歌相踏臥短篷
功名渠自有人了
留我鏡中雙頰紅

五月十四日夜夢一僧持詩編過予有暴雨詩語
頗壯予欣然和之
聯巨軸欲書未落筆而覺追
作此篇

黑雲塞空萬馬屯
轉盼白雨如傾盆
狂風疾雷撼乾坤
壯哉澗壑相吐吞
老龍騰拏下天閭
鱗間火作電脚犇
巨松拔起千年根
浮槎斷梗何足論
我詩欲成醉墨翻

安得此雨洗中原長河衮衮來崑崙鸛鵲下看黃流渾

新塘觀月

攜酒新塘南中夜欲忘歸貪看月滿湖不覺露濕衣天
高鶴聲厲風急螢火稀此夕不一醉行歎破鏡飛漁家
亦喜事未掩水際扉皇天有公道處處皆清暉

觀張提刑周鼎

他人富貴堆金壁曼舞妖歌誇坐客清心好古誰似公
漢庭諸人推博識一朝得此周廟器買不論貲空四壁

苔痕洗盡銅色見坐臥摩挲欲忘食蠻童捧出客為起
恍如清廟陪劒履腹中竒字粲蟲魚嶧山之碑那得比
知公原是功名人看罷握手同悲辛鎬京洛邑在何許
漠漠秋風吹戰塵

口占送巖師還大梅護聖

放翁白髮已蕭然黃紙新除玉局仙寄語山頭老師叔

欲分茅舍度殘年

常禪師偈云更移茅舍入深居謂護聖也

八月十四日夜湖山觀月

長空露洗玻璃碧紫金之盤徑三尺忽看擘地出人間
桂樹扶疎如淡墨攬衣獨立鏡湖邊風露萬頃秋渺然
開帆詎必入東海騎鯨便可追飛仙冰壺玉瀝侵骨冷
醉看孤鸞舞清影夜闌歸舍人已眠却倩天風為吹醒
十五夜月色皦然有頃雲生遂不復見

北望但空濶南望橫羣山青天無翳行素月寥寥永夜
非人間九醞漿成老仙醉六銖衣薄天宮寒翠眉真人
不火食小立環佩風珊珊橫空邀我海山去縹緲萬里

驂青鸞相攜一笑在雲表徐看玉宇飛金盤

夜聞秋風感懷

西風一夜號庭樹起攬戎衣淚濺襟殘角聲催關月墮
斷鴻影隔塞雲深數篇零落從軍作一寸淒涼報國心
莫倚壯圖思富貴英豪何限死山林

玉局歌

玉局祠官殊不惡銜如水清俸如鶴酒壺釣具常自隨
五尺新篷織青筠倚樓看鏡待功名半世兒癡晚方覺

何如醉裏泛桐江長笛一聲吹月落蔣公新冢石馬高
謝公飛旄凌秋濤微霜莫遣侵鬢綠從今二十四考書
玉局

醉歌

往時一醉論斗石坐人飲水不能敵橫戈擊劍未足豪
落筆縱橫風雨疾雪中會獵南山下清曉嶙峋玉千尺
道邊狐兔何曾問馳過西村尋虎跡貂裘半脫馬如龍
舉鞭指麾氣吐虹不須分弓守近塞傳檄可使敵人空

小寇逋誅六十載
狴狴子勢已窮
聖朝好生貸孥戮
還爾舊穴去天東

閉門

寂寂雲山千萬重
閉門不忍歎塗窮
高秋酒熟雪浮瓮
中夜劒歸雷吼空
近報寇戎逃漠北
豈無貔虎定關中
君王猶記孤忠在
安得英豪共此功

草書歌

傾家釀酒三千石
閒愁萬斛酒不敵
今朝醉眼爛巖電

提筆四顧天地窄忽然揮掃不自知風雲入懷天借力
神龍戰野昏霧腥奇鬼摧山太陰黑此時驅盡胸中愁
槌牀大叫狂墮幘吳牋蜀素不快人付與高堂三丈壁

野飲夜歸戲作

青海天山戰未鏖即今塵暗舊戎袍風高乍覺弓聲勁
霜冷初增酒興豪未辦大名垂宇宙空成慟哭向蓬蒿
灞亭老將歸常夜無奈人間兒女曹

夜泊水村

腰間羽箭久凋零太息燕然未勒銘老子猶堪絕大漠
諸君何至泣新亭一身報國有萬死雙鬢向人無再青
記取江湖泊船處臥聞新雁落寒汀

幽居

遶屋巉巉碧玉峰箇中天遣養疎慵捐書已歎空虛腹
得酒還澆壘塊曾曲几坐看窺戶月短篷臥聽隔城鐘
柴桑自有歸來意枉道人間不見容

與隣翁登山亭

數掩槿籬園夕照一間茅舍背陰崖吾生擾擾實無樂
人事悠悠那可諧憂患向來侵綠鬢登臨此日費青鞋
京華舊友凋零盡野老逢迎一散懷

無題

輾轉羶車赴密期追歡最數牡丹時新春欲近猶貪喜
舊愛潛移不自知寶鏡塵生鸞悵望鈿箏絃絕雁參差
玉壺莫貯臙脂淚從濕泥金帶上詩

遣興

平生與俗馬牛風落魄人間亦未窮
綠綺奏終香縷碧
烏絲書罷燭花紅
夢中吳蜀山川近
醉後周秦戰伐空
投老飄然君勿笑也勝魚鳥在池籠

夢宴客大樓上命筆作詩既覺續成之

表裏江山亦樂哉
華纓滿座敵鄒枚
歌從郢客樓中聽
獵向樊姬墓上回
梅蘂香清簪寶髻
熊蹯味美按新醅
眼邊歷歷興亡事
欲賦章華恐過哀

新塘夜歸

煙月茫茫十里堤數聲漁唱埭東西旋燒新兔傾村酒
扶得歸來醉似泥

古風

少年暮黃老雅志在山林火食亦彊勉寧有婚宦心失
腳墮世網衰病忽侵尋放逐適天幸獨恨山未深一牀
元不睡翛然橫素琴開門毛髮冷湖濶月欲沈

又

賀監未嘗死江天醉初醒逸少亦度世弭節過蘭亭吾

金史四庫全書
卷十四
本淡蕩人轉徙如蓬萍聊憑一盃綠駐此雙鬢青邂逅
兩仙翁笙鶴遊青冥還家不能食濁世紛羶腥

又

功名如博戲大叫或作盧文辭組繡耳初不繫賢愚負
恃已可笑憎嫉真區區平生學金丹我豈斯人徒嘯歌
醉自和顏鬢老不枯却後五百年煙雨釣鏡湖

累日無酒亦不肉食戲作此詩

小築精廬剡曲傍枵然蟬腹與龜腸酒錢覓處無司業

齋日多來似太常雲碓旋舂菰米滑風爐親候藥苗香
明年更入南山去要試囊中服玉方

讀書

讀書四更燈欲盡胷中太華蟠千仞仰呼青天那得聞
窮到白頭猶自信策名委質本為國豈但空取黃金印
故都即今不忍說空宮夜夜飛秋燐士初許身輩稷契
歲晚所立慙廉藺正看憤切詭成功已復雍容託觀鰲
雖然知人要未易詎可例輕天下士君不見長松臥壑

困風霜時來屹立扶明堂

自妙相歸將至杜浦堰舟中作

斜陽發東郭初夜轉西城寺閣疎鐘動漁村遠火明蒼
茫林靄滅撲漉水禽驚漸喜吾廬近遙聞過埭聲

秋興

樵風溪上弄扁舟濯錦江邊憶舊遊豪竹哀絲真昨夢
爽砧繁杵又驚秋墜枝橘熟初堪剪浮甌醅香恰受筍
莫道身閒總無事孤燈夜夜寫清愁

哀北

太行天下脊黃河出崑崙山川形勝地歷世多名臣哀
哉六十年邊地起煙塵抱負雖奇偉沒齒不得伸老夫
實好義北望常酸辛何當擁黃旗徑涉白馬津窮追殄
羣寇旁招出鳳麟努力待傳檄勿謂吳無人

琵琶

西蜀琵琶邏迤槽梨園舊譜鬱輪袍繡筵銀燭燕宮夜

一飲千鍾未足豪

故蜀燕王宮今
為張氏海棠園

三江舟中大醉作

志欲富天下一身常苦飢氣可吞匈奴束帶向小兒天
公無由問世俗那得知揮手散醉髮去隱雲海涯風息
天鏡平濤起雪山傾輕帆入浩蕩百怪不可名虹竿秋
月鉤巨鰲倘可求滅迹從今逝回看隘九州

短歌行

百年鼎鼎世共悲晨鐘暮鼓無休時碧桃紅杏易零落
翠眉玉頰多別離涉江采菱風敗意登樓待月雲為崇

功名常畏謗讒興、富貴每同衰病至、人生可歎十八九、
自古危機無妙手、正令挿翮上青雲、不如得錢即沽酒、

悲秋

秋燈如孤螢、熠熠耿窓戶、秋雨如漏壺、點滴連早暮、我
豈楚逐臣、慘愴出怨句、逢秋未免悲、直以憂國故、三軍
老不戰、比屋困征賦、可使江淮間、歲歲常列戍、

步至西村

一飽無餘事、西村偶獨行、櫓筇息微倦、汲井漱餘醒、川

濶雁平度谷虛雲亂生絕知豐歲樂笑語隔柴荆

題接待院壁

笙歌淒咽離亭晚回首高城半掩門
疊疊遠山橫翠靄娟娟新月耿黃昏
未嫌雙舫妨歌枕自是孤舟易斷魂
遙想柯橋落帆處隔江微火認漁村

九月晦日作

菊枝傾倒不成叢桐葉凋零已半空
自是老來多感慨不應蕭瑟為秋風

又

山路清寒近探梅振衣高處興悠哉飛鴻杳杳江天濶
一片愁從萬里來

又

錦城誰與寄音塵望斷秋江六六鱗正使傾家供麴蘖
定知不解醉愁人

又

炊煙漠漠衡門寂寒日昏昏倦鳥還數樹丹楓映蒼檜

天工解作范寬山

陶山遇雪覺林遷菴主見招不果往

山中大雪二尺彊道邊虎跡如梳大衰翁畏虎復畏寒
招喚不來公勿怪梨花開時好風日走馬尋公作寒食
不須沽酒引陶潛箭筍蕨芽如蜜甜

哭王季夷

超遙天馬渥洼來萬里修途忍勒回爽氣即今猶可想
舊遊何處不堪哀夢中有客徵殘錦地下無爐鑄橫財

欲酹一尊身尚病
鬢封春露濕蒼苔

樊江晚泊

碧雲吞日天欲暮
城西捩柁城東路
蓴羹菰飯香滿船
正是江頭落帆處
荻洲漁火遠更明
煙水蒼茫聞雁聲
不是綠尊能破悶
白頭客路若為情

蛾眉村旅舍作

小雨初收景氣和
青苔狼藉落梅多
曲肱野店睡斜日
濯足溪橋鳴細波
久厭俗情生眼白
近承天詔賜顏酡

予自壬寅冬
兩頰復丹 騎鯨未返蓬壺去此路猶須幾浩歌

娥江野飲贈劉道士

春光盎盎催官柳柳色黃如醖中酒橋邊微逕愜幽尋
世外高人共攜手參差茅舍出木末隱映酒旗當浦口
插花處處引村童失道時時問耕叟客堪共醉百無一
事不諧心十常九日斜潮落不可留孤舟欲上頻搔首
丈亭遇老人長眉及肩欲就之語忽已張帆吹笛
而去

颯颯長眉綠覆肩欲推壽數意茫然若非楚國庚寅歲
定是堯時丙子年銅笛一聲驚宿鷺蒲帆數幅破晴煙
遙知乘醉江湖去黃鶴樓頭又放顛

寓舍聞禽聲

日暖林梢鴨鵝鳴稻陂無處不青青老農睡足猶慵起
支枕東窓盡意聽

春晚

雨足人家插稻秧蠶生隣女采桑黃萬花掃迹春將暮

百草吹香日正長
閒覓啼鶯穿北嶠
戲隨飛蝶過東岡
飄然且喜身彊健
不怪兒曹笑老狂

題瑩師釣臺圖

羊裘老子釣魚處
開卷令人雙眼明
未可忽忽便持去
夜窓吾欲聽灘聲

仗錫平老具舟車
迎前天衣印老印
悉遣還策杖
訪之作二絕句奉送兼簡平

畫舫籃輿不許前
白頭行腳意超然
舜江禹穴千山水

盡在高人拄杖邊

又

魚鼓聲中白氎巾
南山筍蕨一番新
長安不是無卿相
林下平津獨可人

湖邊曉行

蹇驢清曉掠湖堤
緩轡迎涼帽影低
露拆渚蓮紅漸鬧
雨催陂稻綠初齊
先秋葉已時時墮
失旦雞猶續續啼
不是老來忘睡美
戴星南畝慣扶犁

久雨杜門遣懷

風雨蕭蕭臥掩關
經旬登覽負溪山
也知解送豐年喜
無奈難消永日閒
平野橫吹看凌厲
畫簷高瀉聽淙潺
城闌路斷吾何恨
濁酒枯魚亦破顏

梅雨陂澤皆滿

雨暗迷行路
溪深沒舊痕
汪汪牛渚白
盎盎酒醅渾
暖浸千畦稻
橫通十里村
羣蛙更堪笑
鼓吹鬧黃昏

夜意

幌外燈青見鼠行
林梢月黑有梟鳴
只言中夏夜偏短
萬里夢回天未明

又

睡覺隣雞已再啼
蓬窓燈暗雨淒淒
東家蹇驢不用借
明日門前一尺泥

幽事

老境俗緣減閒居幽事多
去沙通斷澗插援護新荷
碁罷看山臥釣歸搖櫂歌
餘年端有幾風月且婆娑

對酒戲作

去日犇輪不啻過
凌煙勲業已蹉跎
只言一寸丹心在
無奈千莖白髮何
色比鵝雛京口酒
聲如珠貫渭城歌
身閑取醉真當勉
莫學癡人夢螳窠

夏雨

清風起湖濱
急雨來天末
蚊蠅遽退聽
松竹例蘇活
竒聲集空庭
爽氣生細葛
素秋雖尚遙
聊喜寬肺渴

軍中雜歌

三受降城無壅城賊來殺盡始還營漠南漠北靜如掃
清夜不聞邊馬聲

又

秦人萬里築長城不如壯士守北平曉來磧中雪一丈
洗盡烟塵春草生

又

匈奴莫復倚長戈來款軍門早乞和鐵騎如山尚可避
飛將軍來汝奈何

又

名王金冠玉蹀躞面縛纛下聲呱呱
梟街未遽要汝首
賣與酒家鉗作奴

又

三月未春冰塞川冬月苦寒雪闇天
紫髯將軍曉射虎
嚇殺邊人箭似掾

又

北面行臺號令新繡旗豹尾渡河津
檄書纔下降書至

不用兒郎退敵人

又

漁陽兒女美如花
春風樓上學琵琶
如今便死知無恨
不屬番家屬漢家

又

北庭茫茫秋草枯
正東萬里是皇都
征人樓上看太白
思婦城南迎紫姑

夏夜舟中聞水鳥聲甚哀若曰姑惡感而作詩

女生藏深閨未省窺牆藩上車移所天父母為它門妾
身雖甚愚亦知君姑尊下牀頭雞鳴梳髻著襦裙堂上
奉灑掃厨中具盤飧青青摘葵莧恨不美熊蹯姑色少
不怡衣袂濕淚痕所冀妾生男庶幾姑弄孫此志竟蹉
跎薄命來讒言放棄不敢怨所悲孤大恩古路傍陂澤
微雨鬼火昏君聽姑惡聲無乃譴婦魂

暮歸舟中

五月未劇暑暮從城市還斷虹低飲澗落日遠銜山蟬

舍叢蘆外菱舟薄靄間詩情終草草虛遣鬢毛斑

又

湖水綠可愛弄撓衝夕霏林昏漁火壯山轉寺鐘微
老歎世情惡窮知心事違回頭語孤鶴伴我莫先飛

夏夜

夏夜忽已半東岡月初生起行遶庭樹愛此露滴聲漂
流憶安臥局促念遐征幽懷誰晤語華觴還自傾

又

螢火喜暗庭桐葉矜冷雨幽人悄不寐獨夜誰與處乾
坤信無情歲月遽如許明發視鏡中鬢絲添幾縷

又

庭荒蔓草長堂豁爽氣入悠然推枕起聊作倚杖立飛
螢亦避雨黏棟光熠熠南隣輸稅歸小婦愁夜汲

又

結屋在郊墟條然謝炎熾窓扉故闌寂水竹亦幽邃飛
蟲望燈集栖燕衝雨至石枕與葛幘美哉今夕睡

北渚

北渚露濃蘋葉老
南塘雨過藕花稀
新秋漸近蟬更急
殘日已沉鴉未歸
銅鏡面顏無藥駐
玉關勲業與心違
一蓑一笠生涯在
且醉蒼苔舊釣磯

夏日五鼓起戲書

老雞喔喔桑樹顛
明星磊磊茅屋邊
我興視夜不復眠
坐看朝暾浴虞淵
開窓清風來穆然
拂几洗研整蠹編
火雲崔嵬忽滿天
安得羲和徐著鞭

雨夜

急雨如河瀉瓦溝空堂臥對一燈幽老雞多事彊知曉
落葉無情先報秋身未蓋棺誰可料尊常有酒莫閒愁
功名老大從來事且復長歌起飯牛

小立


曠懷塵事外小立綠陰間舉世皆嫌拙平生剩得閒江
郊雲易暗早歲雨終慳欲醉尊無酒悠然對暮山

徙倚

漁扉夕不掩徙倚欲三更月正樹無影露濃荷有聲
嶠歲將晚悄愴恨難平坐念中原沒男兒恐浪生

居山

涉世緣雖薄居山味自長穿雲雙履濕洗藥一溪香
有酒作臉頰無愁供鬢霜遠天渺歸鶴千載付茫茫



劔南詩藁卷十四